


Venta na vindishi di Paradise Beach Villas cancelá



ORANJESTAD - Te cu ayera tardi 16.00 tur cos tabata mustra cu e venta na vindishi di Paradise Beach Villas lo a bai gewoon dor awe mainta. Alrededor di cinco'or a dreña e noticia cu esaki a keda cancelá.

Ta reinando un confusion grandi actualmente riba e pregunta si PBV a wordo bendí, si of no. Y ta berdad cu Bougainville a cumpré, si of no. Y ta berdad cu e garantía duná dor di gobierno ta válido, si of no. E desarroyonan andando ta mustra cu e todo caso cu e proyecto a keda oficialmente ofrecí na Bougainville N.V. di Lee DiGiovanni. E pakiko cu e venta na vindishi - apesar di noticianan positivo di e venta - a keda mantení, aparentemente tin di haber cu e cuestion di garantía cu no ta completamente rond. E strobacionnan legal pa motibo di a encaminá un procedura contrario na ley por a stroba un que otro, di manera cu e fase aki mester wordo corregí legalmente ainda. Den e caso di PBV, consorcio di Banconan ta e entidad importante pa bisa cual solucion di venta e kier mira realizá pa cu e proyecto. Banconan a duna orden pa bende PBV na vindishi. Y ta Banconan a retirá tambe ayera e peticion. Fuera di e especulacionnan ariba mencioná, ta lógico tambe cu Banco nunca por a mantené su decision. E interesnan envolví t'asina pisá y crucial cu si a yega na venta di un vindishi e chèns ta grandi cu e derechonan di timeshareholders lo wordo negligishá. Y apesar cu Banconan nan interes ta puramente comercial, toch nan no por permití cu dicho consecucionan lo forma parti di e venta. □